

# adr-

ALTERNATIV DEMOKRATESCH  
REFORMPARTEI

# de pefferkär

## D'Alternativ fir Péiteng

### Gemengewalen 2017

## Lëscht 7

### Firwat sollt Dir e Sonndeg d'ADR wielen?

D'ADR ass eng sozial engagéiert Partei, déi d'Wärter, d'Kultur an d'Sprooch vum Lëtzebuerger Land vertritt a verdeedegt. Mir maachen eis staark dofir, datt eis Lëtzebuerger Traditiounen an eis Manéier mateneen ze liewen dem Land a senge Bierger erhalte bleiwen. Net nëmmen um nationalen Niveau, mee och um kommunalen, triede mir a fir d'Rechter vum Eenzele an de Respekt vun der Demokratie.

Eng gutt Gemeengeféierung këmmert sech ëm d'Sécherheet an d'Biergerbedeelegung. D'ADR setzt sech a fir passend Sécherheitsmoossnamen an all Gemeng. Mir ginn eis net zefriden, bis all Mënsch sech hei am Land nees sécher fillt a sech iwwerall ouni Angscht beweegen kann, an dëst och zu spéider Stonn. A punkto Biergerbedeelegung fanne mir et méi wéi traureg, datt bis elo Gemeengepolitik dacks iwwert d'Käpp vun de Leit ewech gemaach gouf.

D'ADR wëllt d'Gemengen zesumme mat hiren Awunner gestalten, an als hir Verrieder d'Gemeng geréieren, am plaz ze dirigéieren. Aus deem Grond fuerdert d'ADR kloer de Referendum op kommunalem Niveau a mécht sech staark géint Korruptioun a Vernetzwirtschaft an der Politik. Zesumme mat den Awunner wëlle mir eng Gemeng schafen an erhalen, déi net just bewunnbar ass, mee och déi néideg Liewensqualitéit bitt. Dëst mat engem Wunnraum, deem d'Leit sech leeschte kënnen, ouni dofir mussen u Liewensqualitéit anzéiessen.

D'ADR mécht Politik, déi sech no de Bedierfnesser vun de Leit ríicht an net ëmgedréint. Mir sinn dofir fir eng realistesch an effizient Ëmweltpolitik, déi net duerch realitéitsfriem Normen a Virschreften de Leit an der Gemeng d'Bezuele vu Wunnraum onméiglech mécht. D'ADR wäert beim Erhalte vu wäertvoller Bausubstanz hëllef, an net d'Renovéieren an d'Baue mat iwwerspëtze Reglementer onméiglech maachen. D'ADR mécht Politik fir d'Leit a mat de Leit.

Weider nach wëlle mir verhënneren, datt de Staat iwwert de Käpp vun de Gemengen ewech Entscheedungen trëfft, mat deenen d'Gemengen an hir Awunner direkt konfrontéiert sinn. Sou wäerte mir et net

hinhuelen, datt de Staat, ouni der Gemeng an hiren Awunner hiert Zoustëmmen, e Flüchtlingsfoyer an der Gemeng ariicht.

Mir als ADR maachen eng kanner- a familjefrëndlech Gemeengepolitik. Mir fërderen héichwäerteg Crèchen, fuerderen awer, datt d'Elteren och ëmmer d'Méiglechkeet hunn, hir Kanner mat der néideger Zäit an Opmierksamkeet doheem erzéien ze kënnen. Mir sti fir eng Gemeengeféierung, déi maximal sozial ass, bei där kee Mënsch vergiess gëtt, och net eis eeler Matbierger, déi mat Krankheet oder Behënnerung.

D'ADR wäert sech dofir staark maachen, datt d'Gemeengefinanze kompetent, sozial a mat Verstand gereegelt ginn. Da kënn et net zu deenen onnëtzten an onsozialen Erhéijunge vun Taxen. Bestoend Taxe wäerte mir no soziale Kritären upassen, sou datt et hei eng méi gerecht Verdeelung wäert ginn. Deementspriedend géinge mir dofir suergen, datt d'Waassertax sozial berechent gëtt.

Sou hätt all Awunner pro Joer e gratis Waassersockel op de Kapp zegutt, an duerno gëtt de Waasserverbrauch mat enger progressiv gestaffelter Tax berechent. Domat hätt all Bierger säin néidege Grondverbrauch u Waasser ofgedeckt – schliisslech handelt et sech hei ëm e mënschlecht Grondbedierfnes. Esou eng progressiv Präisstafelung géing awer gläichzäiteg verhënneren, datt déi liewenswichtig Ëmweltressource ouni nozedenke géing verbëtzt ginn.

**ADR:**  
**jonk a**  
**couragéiert**

hir Gemeng asetzt.

Duerfir: Den 8. Oktober all Stëmm fir d'ADR. Fir eng besser Gemeng. ADR – déi richteg Alternativ!

**Finanzen:**  
**kompetent a**  
**sozial verwalt!**

D'ADR ass eng jonk a couragéiert Partei, déi hir Iddien net just a schéine Sondersiede versprécht, mee och wierklech duerchsetzt a sech honnertprozenteg fir



### Inhaltsverzeechnes

Firwat sollt Dir e Sonndeg d'ADR wielen?

Säit 1

Bezuelbare Wunnraum mat Kapp a Verstand!  
Gratis öffentlechen Transport a keng Autoschikanen

Säit 2

Fir datt all Bierger a senger Gemeng mat-schwätze kann!  
De Picky mengt: ...  
6 Prioritéite fir eis Gemeng  
Eng transparent a kloer Asiicht bei den Taxen!  
Eng jugendfrëndlech Gemeng

Säit 3

Wat sinn d'Alternative fir Är Gemeng?  
Historesch an architektonesch Schätz fleegen!  
De Picky seet: ...  
[Member-Formulär](#)

Säit 4

30 Fudder Waasser gratis op de Kapp géint deier „gréng“ Gemeengepolitik  
D'Regierung reift sech d'Hänn!

Säit 5

Öffentlech Sécherheet heescht Sécherheet fir jiddereen!

Säit 6

D'Gemengen an der Wuesstemsfal Richteg wielen!

De Picky erënnert sech: ...

Säit 7

[Eis Kandidate fir Är Gemeng](#)

Säit 8



## Bezuelbare Wunnraum mat Kapp a Verstand!

Wat kann d’Gemeng maachen, fir hiren Awunner genuch Wunnengen zu engem bezuelbare Präis ze bidden? Si huet am Prinzip zwou Zorte Klientel: op där enger Säit déi Leit, déi genuch Mëttelen hunn, fir eng eege Wunneng ze finanzéieren oder ze lounen, an op där anerer Säit déi Leit, déi ganz reell finanziell Schwierigkeeten hunn, fir um Lëtzebuerger Wunnengsmaat e bezuelbaren Daach iwwert dem Kapp ze fannen.

Leit, déi an enger Gemeng lounen, sollte sech kënnen op eng gutt funktionéierend Loyerskommissioun verlossen, déi mat duerfir suergt, datt si net ze deier bezuele mussen.

### Moosname fir Leit mat klengem Akommes

All Gemeng soll fir sech e gewëssene Prozentsaz u gutt iwwer d’Quartiere verdeelte Sozialwunnengen festleeën, fir keng “Ghettoen” ze schafen. Gemenge mat vill Sue kënnen an e Fong fir soziale Wunnengsbau investéieren.

- D’Prozedur, fir eng sozial Wunneng zougedeelt ze kréien, muss transparent sinn, esou datt jidderee ka wëssen, wéini him ka gehollef ginn.
- D’Gemeng soll hire Bierger awer och hëllef Proprietär ze ginn, z.B. mat Bankgarantien.
- “Portage foncier” ass besser wéi “Bail emphytéotique”. Beim Portage gëtt de Bau-terrain fir e symbolesche Betrag gelount an de Kafpräis erfält no e puer Joer, wann zum Beispill de Bau vum Haus bezuelt ass.

Bei gréissere Projeten am soziale Wunnengsbau soll en Deel Wunnenge fir Leit reservéiert sinn, déi net genuch verdéngen, fir eleng ze bauen, gläichzäiteg awer zevill, fir vum Stat gehollef ze kréien.

### Moosname fir Leit, déi bauen oder kafen

- D’Bauufuerderungen däerfen de Präis vum Bau net iwwerdriwwen an d’Luucht dreiwen. Eng Gemeng däerf net den Haustyp (Passivhaus) bestëmmen.
- D’ADR ass géint de staatlechen Zwang an d’Amëschen a privat Affären: Dat gëllt och fir d’Virkaftsrecht vum der Gemeng, fir Baulücken an eidel Wunnengen. Proprietären däerfe vun hirer Gemeng net gediirengelt ginn, mee si sollen iwwerzeegt ginn.
- Verkeeft d’Gemeng eegen Terrainen um fräie Wunnengsmaat, däerf si keng Maartpräisser froen. Si muss hëllef, de Präis vum Bauland bezuelbar ze maachen.

Dat traditionellt Lëtzebuerger Bild vum eegenen Eefamilljenhaus ass fir vill Leit net méi bezuelbar. Dat wäert de Charakter vun eisen Uertschaften änneren. D’Gemeng muss awer oppassen, datt hire Charakter net vëlleg entfällt gëtt. Si muss kucken, fir ënner dem Bevëlkerungsdruck natierlech ze wuessen a weider Liewensqualitéit ze bidden. Si däerf net zur Schlofgemeng oder zur Wunnsiddlung ouni Séil ginn.

## Gratis ëffentlechen Transport a keng Autos-Schikanen

De Verkéier zu Lëtzebuerg verschlëmmert sech ëmmer weider. D’Gemeng muss e sécher a gläichberechtigt Matenee vun alle Verkéiersteilnehmer garantéieren.

D’ADR huet eng kloer Linn a Saachen ëffentlechen Transport:

- Mir trieden a fir gratis ëffentlechen Transport fir jiddereen.
- Gemengenefforte fir den ëffentlechen Transport musse vum Staat ënnerstëtzt ginn.
- Den Tram ass keng Solutioun vum Verkéiersproblem, a mir si géint d’Ubanne vu weideren Uertschaften.
- Gemenge solle sech esou efficace wéi méiglech a regionale Reseau verbannen, dëst an Ofsprooch mat den Awunner. All Mënsch muss och no der Owes-Virstellung am nächste Kino (also bis Hallefnuecht) nach gutt mam ëffentlechen Transport heemkommen.
- D’Awunner sollen zum Beispill iwwer d’Zuel an d’Plaz vun den Haltestellen an och iwwer d’Organisatioun vum Schoultransport kënnen matschwätzen.
- Iwwerwachungskameraen a Bussen an Zich hëllef den ëffentlechen Transport méi sécherzemaachen.
- Individualverkéier muss eng Wiel bliwen.

Dräi Véirel vun den Trajeten am Land gi mam privaten Auto gemaach. Et ass net un enger Gemeng oder um Stat, dës private Choix ze kontestéieren oder ze beaflossen.

D’ADR ass géint Schikane fir Autofuerer (iwwerdrifwe Verkéiersberouegung, kënschtlech Verknappung an Iwwerdeierung vu Parkméiglechkeeten, ze knappe Parking résidentiel, ze penibel Kontrolle vu

Parkziedelen op d’Sekonn ...).

Null Toleranz erwaart deen Automobilist, deen ze séier an der Uertschaft ass, deen récksiichtslos parkt oder nuets onnéideg Kaméidi mam Auto mécht.

Null Toleranz gëllt fir Foussgänger a Vëloen, déi sech net un d’Verkéiersregelen halen.

Onnéideg geféierlech Situatiounen (Vëlo- oder Busspueren a Géierichtung an den Einbahnstroossen, Vëlosspueren op Trëttoiren an a Foussgängerzonen ...) wäert d’ADR net bestoe loosse.

Mir garantéieren

- en Ausnotze vum ganze méigleche Parkraum vun der Uertschaft.
- eng Reglementéierung vum Parke vu Betriebs-camionnettë baussent de Wunnzonen.
- fléissende Verkéier op den Hauptverkéiersachsen an d’Uertschaft an aus der Uertschaft mat, wann néideg, entsprechende Contournementen.
- verkéiersberouegt Wunnquartieren.
- gutt Stroosseninfrastruktur a Verkéiersweeër, an dat och fir Foussgänger a Vëlofuerer.

De Vëlo ass an deene meeschte Fäll méi e Sport- a Fräizäitgefiel wéi e Fortbewegungsmittel fir schafen oder akafen ze fieren. Deementspriedend sollte Vëlospisten och méi regional an touristesch gesinn an ausgebaut ginn.

Vëlosservicer, wéi si a verschiddenen Uertschaften bestinn, géinge vun eis op hiren Notzen an hir Käscht geprüft ginn. Och de Sécherheetsrisiko duerch ongeübte Vëlofuerer, de récksiichtslosen Asaz a Foussgängerzonen, d’Benotze vum Vëlo als Spillsaach an de Vandalismus, deem dës Gefierer ausgesat sinn, sollen ënnersicht ginn.



An den enke Péitenger Stroossen ass de Busverkéier eng abenteuerlech Geschicht.



## Fir datt all Bierger a senger Gemeng matschwätze kann!



Nëmmen eng Gemeng déi no um Bierger ass, ka fir dësen och wierklech do sinn!

D'politescht Matsproocherecht vum eenzele Bierger ass fir d'ADR ganz wichteg. Mir stinn dofir an, datt déi direkt politesch Participatioun an d'Transparenz an der Gemeng erhalen a weider ausgebaut ginn, andeems

- de lokale Referendum mat vereinfachte Modalitéiten erméiglecht gëtt.
- d'Bierger gutt a korrekt informéiert ginn, duerch:
  - d'Internetiwwerdroung an d'Archivéiere vu Gemengerotsëtzungen.
  - objektiv a politesch neutral Berichter vun de Gemengesëtzunge fir all Stot, an dëst net eréischt Méint no der Sëtzung.
  - Informationsversammlunge viru grouse Projeten a wichtege Decisiounen.

- e lokalen Televisiounskanal vun der Gemeng iwwer Kabel-TV an/oder Internet.

Der ADR no muss den Déngscht um Bierger eng Prioritéit fir d'Gemeng sinn. Dowéinst këmmere mir eis dorëm, datt d'Gemeng

- administrativ Demarchen esou einfach wéi méiglech mécht.
- och baussent „normalen“ Bürosstonne fir dës Demarchen accessibel ass.
- och fir staatlech Verwaltunge Biergerdemanden entgéin huelen an dobäi berode kann.
- méiglech vill Demarchen och iwwer Internet zur Verfügung stellt.
- nieft dem Online-Format weider ëmmer nach d'Pabeierformat ubitt.

## 6 Prioritéite fir eis Gemeng

1. **Bezielbaart Wunnen:** D'ADR huet konkret Solutiounen fir d'Gemeng!
2. **Öffentlech Sécherheet** heescht Sécherheet fir jiddereen: Eis Gemeng brauche méi Police, eis Bierger brauche Kommissariater, do, wou si wunnen.
3. **Mobilitéit** ouni **Dirigismus:** D'Gemeng organiséiert de Matenee vun Auto, Foussgänger a Vëlo. Si mécht net de Choix vum Verkéiersmëttel.
4. **Famillje mat Kanner** beschtméiglech ënnerstëtzen: Mir brauchen Uertschaften, wou Kanner sech kënnen wuelfillen an entfalten.
5. **D'Lëtzebuerger Sprooch** als wichtegst Mëttel zur Integratioun: Un der Gemeng ass et, eis Sprooch ze verbreeden.
6. **Flüchtlingen** ophuelen, mat Häerz awer OCH mat Verstand: D'Gemeng muss an dëser Fro matschwätzen an d'Decisiounen därefen net iwwer d'Käpp vun de Bierger ewech geholl ginn.

Dir fannt eise ganze Programm fir d'Gemengewalen op eisem Internetsite:

[www.adr.lu](http://www.adr.lu)

## Eng transparent a kloer Asiicht bei den Taxen!

Bei den Taxen vun der Gemeng muss een haut scho bal studéiert hunn, fir ze verstoen, wéi de Präis sech zesummesetzt. D'ADR trëtt a fir Tariffer, déi all Mënsch novollzéie kann. Dëst kéint och bei der Sich no enger neier Wunneng en Argument sinn, wann all Gemeng kéint annoncieren, wat de Liter Waasser oder de Kilo Offall an der Dréckskëscht kascht. Et gëtt kee valabele Grond, firwat d'Supermarkéen transparent Kilos- a Literpräisser affichéiere mussen an d'Gemengen net.

## Eng jugendfrëndlech Gemeng

D'Drogeproblematik bei der Jugend bleift leider aktuell. Si stellt sozial an och gesondheetlech, fir de Beträffenen a fir seng Famill a säin Ëmfeld e grouse Problem duer.

D'ADR setzt sech dofir an, datt d'Gemeng e spezielle Service schafft, deem déi betraffe Jugend opfänkt. Dëse Service soll eng diskret Ulafstell bidden, wou betraffe Jugendlecher an hiert Ëmfeld sech kënnen beroden an Hëllef loosse. Mir wäerten och Selbsthëllefgruppen an der Gemeng fërderen a probéieren, hinnen diskret Versammlungsméiglechkeeten ze ginn.

Mir suergen dofir, datt et en aktivt Jugendhaus gëtt, wou Jonker sech entfale a beschäftege kënnen, mat Hëllef vun Educateuren, wa si dat wëllen.



La Commune Administration Résidents

### ACTUALITÉ

#### Elections communales 2017

11.09.2017

Résultat des numéros attribués par tirage au sort aux listes de candidats déposées dans la commune de Pétange.

Au vu des élections communales du 8 octobre 2017, le tirage au sort des numéros des listes de candidats a donné le résultat suivant pour la commune de Pétange:

- Liste 1 – déi gréng
- Liste 2 – LSAP
- Liste 3 – CSV
- Liste 4 – DP
- Liste 5 – Déi Konservativ
- Liste 6 – Piratepartei
- Liste 7 – adr
- Liste 8 – déi Lénk



De Picky mengt:

Wa scho knäipen, dann awer oppasse bei wem!





## Wat sinn d'Alternative fir Är Gemeng?

Mir stellen an der Gemeng déi richteg Froen: Wat nutzen zum Beispill déi bescht Reglementer, wann net genuch Police d'Sécherheet ka garantéieren?

D'ADR ass och géint d'staatlecht Aariichte vu Flüchtlingsfoyeren, ouni datt d'Gemeng an hir Bierger gefrot ginn. Beim Wunnensbau weess d'Gemeng besser wéi de Staat, wou séier ka Wunnraum geschaf ginn.

D'Gemeng ass do, fir hire Bierger d'Liewen einfach ze maachen. Un d'Beruffs- a Privatliwen ugepassten Öffnungszäiten, "Guichet unique"-Funktione fir staatlech a kommunal Froen an Interaktivitéit am Internet sinn do néideg.

Op de Gesondheetsniveau iwwerdroen:

Eng ADR-Gemeng wäert Drock maachen, fir mat regionalen Dokteschhaiser (an hiren Hausapdikten) eng zäitgeméiss Versuergung ze organiséieren, déi de berufflechen a familiäre Besoine vun de Bierger entsprécht.

D'Gestioun vun de Gemeengefinanze „en bon père

de famille" heescht, datt Kreditter just fir konkret Investitiounen opgehooll ginn.

Et ass keng Aufgab vun der Gemeng, z. B. iwwer intelligent Compteuken, den Energiekonsum vun hire Bierger auszespionéieren.

Realistesche Klimaschutz ass eng Gemeengeprioritéit. D'Nodeeler vun den erneierbaren Energien: – Kaméidi, Ästhetik, Schiet an der Natur, finanziell Auswierkungen – däerfen net op de Bierger oder d'Betribler ofgewänzt ginn.

D'Gemeng ass awer net do, fir hir Bierger duerch héich Taxen ze zillen an duerch eng Verknappung vu Parkplazen oder duerch onsënneg Reglementer an aner Schikanen um Autofueren ze hënnere.

D'Gemeng soll beim Erhale vu wäertvoller Bausubstanz hëllefen, an net d'Renovéieren an d'Baue mat iwwerspëtzt Reglementer onméiglech maachen.

D'ADR verdeedegt de Choix vum Bierger sou wéi och säi Recht, säi Liewen an eventuell säi Betrib no besstem Ermoossen ze féieren.



Eng Gemeng muss wësse wat hir Aufgabe sinn, dës eescht huelen an hirer Verantwortung nokommen!



### De Picky seet:

Gréng wierkt... ganz besonnesch am Portmonni, z.B. mat vill Erhéijunge vun den Taxen, sou wéi fir d'Dreckskechten. Oder mat méi héije Präisser fir den öffentliche Verkéier.

## Historesch an architektonesch Schätz fleegen!

Der ADR ass et wichteg, datt eng bestëmmte Liewensqualität an der Gemeng ginn ass. Dëst steet am direkten Zesammenhang domat, datt en Ëmfeld erhalen oder geschaf gëtt, an deem d'Leit sech kënnen wuelfillen. Dozou gehéiert och d'Erhale vun eiser traditioneller Bausubstanz a vum Charakter vun der Stiet an Dierfer. Schliisslech ass dëst – nieft der Lëtzebuerger Sprooch – e wichtigen Aspekt vun eiser Identitéit.

Mir setzen eis dofir an, datt

- regional-typesch Gebaier a Bausubstanze mat kulturellem Wäert erhalen ginn.
- et kommunal Subside ginn, fir d'Renovatioun an d'Sanéierung.
- d'Gemeng, wann néideg, wäertvoll Gebaier keeft, fir den Erhal ze sécheren.
- d'Bierger fir déi kulturell Schätz vun hirer Uertschaft sensibiliséiert ginn.
- d'Gemeng dofir suert, datt historesch Plazen net duerch onpassend Konstruktiounen verschampeléiert ginn.
- mat kierchleche Bausubstanze verantwortungsvoll a respektvoll ëmgaange gëtt.

----- ausschneiden an un ADR 20, rue de l'Eau L-1449 Lëtzebuerg schécken -----



**Gitt Member an der ADR, a frot och Är Famill a Frënn, fir Member ze ginn.**

De Joresbäitrag ass fir eng Persoun 14.-€, fir e Stot 20.-€, a fir Schüler a Studenten 5.-€

Numm & Virnumm: .....

Adress: .....

Telefon: .....

E-Mail: .....

## de pefferkär

**Oplag: 7.300**

**Verantwortlech fir dëse  
pefferkär**

**fir d'Gemeng Péiteng ass  
d'Alternativ Demokratesch  
Reformpartei  
22, rue de l'Eau  
L-1449 Lëtzebuerg**

**www.adr.lu**



## 30 Fudder Waasser gratis op de Kapp géint deier „gréng“ Gemengepolitik

Schonn e komescht Gefill, wann ee mueres fréi d'Leit mat hire Grompereschiele gesäit ëm d'ëffentlech Dreckschëscht schläichen ... Dreck ass e richteg deiere Spaass ginn. A wie seng deier bezuelte Poubelle méi dacks virun d'Dier setzt, dee brauch sech iwwer d'Gemengerechnungen net ze wonneren. Duerfir entsuerge Leit hir Reschter ëmmer méi dacks an d'ëffentlech Dreckschëschten, déi dann och séier voll sinn, esou datt d'Leit net wësse wouhi mat deene Saachen, déi daagsiwwer esou ewechzegeheie sinn, wann een net doheem ass.

Gewosst ass, datt praktesch all zweet elengerzéiend Mamm de Risiko huet, an d'Aarmut ze falen. Wéi soll esou eng Mamm mat zwee kleng Kanner an engem entsprecheende Verbrauch u Wëndelen iwwer d'Ronne komme, wann eis Gemeng hir bei der Poubelles-Tax an d'Täsch gräift?

Un deem Beispill erkennt een, wéi ongerecht déi Gemengentaxe sinn. Si treffe jiddereen d'nämmlecht, deen, de sech et ka leeschten an esou Zommen aus dem Aarm rëselt, awer och deen, deen all Mount Problemer huet, fir iwwer d'Ronnen ze kommen. Dat ass genee wéi d'TVA, déi och den Ënnerscheed net mécht, ob deen deen akeeft, räich oder aarm ass. Dës Taxen treffe jiddereen d'nämmlecht, awer si dinn deenen enge méi wéi wéi deenen aneren.

Et war ni esou, datt d'Leit Problemer haten, fir d'Rechnunge vun der Gemeng ze bezuelen. Et ass awer esou, datt d'Taxepolitik an eng Richtung gaangen ass, datt d'Leit ëmmer méi déck Rechnunge kruten. No enger grénger

**Gréng  
wierkt ... mee  
just op de Port-  
monni!**

Iddi sollten d'Leit reell bezuelen, wat e Gemengservice kascht. Dat onofhängeg dovun, datt vill Gidder a Servicer, déi d'Gemeng eis verkeeft, jo net der Gemeng gehéieren, mee och all deene Leit, déi et deier musse bezuelen.

Zum Beispill d'Waasser, wat ee fréier selwer un eng

Quell siche gaangen ass. Parallel sinn ëmmer méi streng Riichtwäerter festgesat ginn, déi d'Liwwerung vun extra propperem Waasser och ëmmer méi deier gemaach hunn. Allerdéngs ass d'Waasser och ëmmer méi belascht ginn a war méi schwéier drénkfärdig ze maachen. Dat war awer net d'Schold vun all Mënsch, mee all Mënsch muss haut fir déi deier Filteranlage bezuelen.

D'ADR setzt hei un an zwar mat enger sozialer Approche.

Eis Iddi, fir all Mënsch fir d'éischt emol 30 Fudder (also 30.000 Liter) Waasser

am Joer gratis ze

ginn an de Waasser-erverbrauch, deen do-

riwwer erausgeet progressiv gestaffelt ze taxéieren, mécht genee dat. Dat Gratis-Waasser geet ongeféier duer, fir de Verbrauch fir d'perséinlech Hygiène ze decken. Wat elo am Stot nach ufält, fir ze kachen an ze botzen, kascht e vernënftige Waasserpräis.

Wien allerdéngs all Dag e risege Gaart nützt (ouni Reewaasser duerfir ze sammeln), wien all Dag Trëttoir, Gaardemauer a viischt Trap ofsprézt, den Auto wäscht an eventuell och nach eng grouss Schwämm hannert dem Haus huet, muss sech bewusst sinn, datt dee Luxus op d'Waasserrechnung schléit esou bal säi Verbrauch iwwert dem Sockel läit.

- **D'ADR setzt sech a fir de Bierger!**
- **D'ADR denkt an handelt sozial!**
- **Bei der ADR geet d'praktesch Approach iwwer all blann Ideologie!**

D'ADR ass géint Dirigismus iwwert de Portmonni: Mir sinn do, fir dem Bierger ze hëllefen, an net fir de Bierger mat deieren Taxen ze strofen. Mir halen eis net fir de d'Schoulmeeschter vum Land ... an ënnerscheiden eis domat vun allen anere Parteien.

**30 Fudder  
gratis Waasser  
fir jiddereen**

## D'Regierung reift sech d'Hänn!

Ass lech eigentlech opgefall, datt de ganze Summer, an elo nach bis an den Hierscht iwwerhaupt net vun eiser Regierung geschwat ginn ass? Bei hirem Beléiftheetsgrad wäert Gambia doriwwer awer och net rose sinn. Esou Gemengewale sinn dach och d'Geleeënheet, fir Gambia ze weisen, wéi beléift d'Regierung ass.

Tatsächlech steet d'Regierung och an dese Gemengewalen zur Wiel: Et sinn déi nammlechte Parteien, déi d'TVA erhéicht hunn, déi an de leschte Joren ënert ecologesche Virwänn och un de Gemengentaxe gedréint hunn, bis vill Leit et bal net méi packen.

Et ass déi nammlechte Regierung, déi op Wuessstem schwiert, an deenen hir lokal Politiker d'Infrastrukturen net méi an der Rei gehale kréien a keng bezuelbar Wunneng an hirer Gemeng kënnen presentéieren. Wann d'Gemengen am Verkéier erstécken, läit dat och un deem Wuessstem, deen d'Regierungsparteie mam bloe Finanzminister a mat de Gambia-Lokalpolitiker an der Chamber feieren. An de gréngen Transportminister kritt de Chaos net an de Grëff.

Et ass d'Gambia-Regierung, déi d'Stied forcéiert, ëmmer méi Awunner ze hunn an och dat lescht Stéck Gewan zouzebauen fir méi Suen ze kréien. Net nëmme schuet d'Politik de Landgemengen, mee si mäsch d'Hauptstad an d'Gemeng ronderëm an och grouss Südgemengen, well si wuessen, obwuel déi haut schonn éischter zevill Awunner hunn, wéi net genuch.

Wann also DP, LSAP an Déi Gréng lech dat Blot (oder dat Rout oder dat Gréngt) vum Himmel versprechen oder sech iwwert den Zoustand an der Gemeng bekloen a soen, si kéinten awer net duerfir, denkt drun, datt si an hir Parteien an der Chamber déi Politik matdroen, déi hei am Land d'Problemer mécht!

## Matschaffen! Froen? Ureegungen!

**Hutt Dir Froen oder Ureegungen oder wëllt Dir bei ons aktiv matschaffen, dann zéckt net a rufft un, ënner der Nummer:**

**+352 26 20 37 06**



### Walprogramm (Lëtzebuergesch)

- [https://adr.lu/alternativ\\_2017\\_l/](https://adr.lu/alternativ_2017_l/)

### Wahlprogramm (Deutsch)

- [https://adr.lu/alternativ\\_2017\\_d/](https://adr.lu/alternativ_2017_d/)

### Programme électoral (Français)

- [https://adr.lu/alternativ\\_2017\\_f/](https://adr.lu/alternativ_2017_f/)

### Election program (English)

- [https://adr.lu/alternativ\\_2017\\_e/](https://adr.lu/alternativ_2017_e/)

### Programa eleitoral (Português)

- [https://adr.lu/alternativ\\_2017\\_pt/](https://adr.lu/alternativ_2017_pt/)





## Ëffentlech Sécherheet heescht Sécherheet fir Jiddereen!



### Net nëmme Péiteng selwer brauch méi Policepräsenz an och net just mueres!

All Mënsch huet e Recht drop, sech a sengem Land, senger Gemeng a sengem Heem sécher ze fillen! Dofir mussen de Stat an d'Gemeng enk zesummeschaffen. Bei där Zesummenaarbecht muss d'Gewiicht vun der Gemeng awer rëm méi staark ginn, well dës am nooste mam Bierger a Kontakt steet. Dowéinst setze mir eis dofir an, datt

- de Staat an d'Gemeng Hand an Hand schaffen.
- Themen, wéi z.B. d'Burka-Verbuuet, déi just national an eenheetlech kënnen geregelt ginn, net op d'Gemengen däerf ofgewänzelt ginn.

D'Zesummenaarbecht tëscht der Gemeng an der Police muss awer och méi enk ginn. Hei maache mir eis staark dofir, datt d'Gemeng:

- zesumme mat der Police a mat senger Bierger e lokale Sécherheetsplang ausschafft, dee regelméisseg op seng Efficaciteit iwwerpréift gëtt.
- méi e grouss Matsproocherecht bei der Policepräsenz huet, mat Berécksiichtigung vun de kommunale Policereglementer.

D'Police muss méi no bei de Bierger. Si soll méi eng grouss Präsenz um Terrain weisen an et däerf net zu rechtsfräien Zone kommen, wou d'Police net higeet. Dowéinst setze mir eis dofir an, datt

- d'Police déi néideg Moyenen (z.B. de Plazverweis) a genuch Leit huet, fir agéieren ze kënnen.
- a méi onrouege Quartiere Kommissariater kommen, déi 24 op 24 Stonne besat a fir d'Bierger accessibel sinn.
- d'Police, wann si et wënscht, adequat Lokaler vun der Gemeng zur Verfügung gestallt kritt.
- op besonnesch sensibelen, ëffentleche Plaze Kameraen installéiert ginn, awer ënner strengen Oplagen a mat Respekt virun der Privatsphär.

D'ADR wäert sech weider fir d'Konzept vun enger Noperschaftspolice asetzen.

### Aarmut an organiséiert Heeschen

D'ADR suergt dofir, datt d'Gemeng efficace Méiglechkeete kritt, fir organiséiert Heescherei, sou wéi aggressiivt Biedelen ze verbidden. D'fräit Zirkuléiere vun de Bierger an Europa gëllt, wann dës genuch eege Mëttelen hunn, fir hir Existenz ofzesécheren. Dës soll och um kommunale Plang agehale ginn. Fir dat ëmsetzen ze kënnen, mécht d'ADR sech staark, fir datt d'Police

- mat der Ënnerstëtzung vun der Justiz an eventuell vun der Douane, déi néideg Moyene kritt, fir dat organiséiert Heeschen an de Grëff ze kréien.
- gewësse Leit e Plazverweis ka ginn, woumat hinnen den Openthalt op bestëmmte Plaze verbuede gëtt.
- dës Dispositioun net just bei organiséierten Heeschebanden oder bei aggressivem Biedelen uwendet kann, mee och fir géint aner Banden, kriminell Organisatiounen an Drogendealer virzegoen.

Nëmmen esou Moosnamen an deen néidege gesetzelche Kader kënnen zu enger Verbesserung vun der ëffentlecher Sécherheet féieren.

Der Aarmut muss anescht entgéintgewierkt ginn, wéi Heeschen als e Mënscherecht ze deklaréieren. Fir d'ADR kann dës keng Léisung sinn. Dofir ënnerstëtze mir – net just op nationalem, mee och op kommunalem Plang – datt Leit an Nout, déi e Recht hunn, hei am Land ze sinn, gehollef kréien. Als méiglech Moosnamen, gesi mir vir, datt déi Betreffen

- en Ënnerdaach an en würdegt Liewen erméiglecht kréien, z.B. mat betreitem Wunnen, Nuetsfoyeren, Vollekskichen, Kaffis- an Téistuffen.
- déi an enger spezieller Situatioun sinn, – Koppelen, Leit mat Kanner oder mat Hënn, asw. – géeegegt Léisunge musse proposéiert kréien.
- och op kommunalem Plang vu besser koordinéierten zoustännegen Organisatiounen betreit ginn.

Mat esou Moosname viséiere mir, d'Leit „déi op der Strooss liewen“ nees an d'Gesellschaft ze integréieren, mat enger Wunneng, enger Aarbecht, an enger reeller Liewensperspektiv.

### De Rettungsdéngscht an d'ëffentlech Aariichtungen

D'ëffentlech Aariichtungen vun enger Uertschaft kënnen Schutz bidden an zur Sécherheet bäidroen, wa si bestëmmte Konditiounen erfëllen. Dowéinst setzt sech d'ADR an der Gemeng dofir an, datt

- urban Miwwelen (Busarrëten, Bänken, asw.) op ëffentleche Plazen esou ugeluecht sinn, datt weder donkel Gestalten nach Vandalen ulackelt.
- ëffentlech Gebaier (d'Gemeng, d'Schoulen, asw.) duerch technesch Moosnamen ewéi Alarmanlagen oder duerch d'Präsenz vu Personal geschützt ginn.

Och de Rettungsdéngscht spillt eng Roll bei der Sécherheet. Oft si Mënschen an Noutfäll – wou et net seelen ëm Liewen an Dout geet – op hir Präsenz a qualifizéiert Hëllefsléistungen ugewisen. Eng national Reform vum Pompjees- a Rettungswiesen ass an der Maach. D'ADR begréisst déi grouss Prinzipie vun dëser Reform, awer mir maachen eis och staark dofir, datt

- d'Gemeng hei net u Responsabilitéit verléiert, andeems eng ganz Rei vun de Gemengenaufgaben op den nationale Plang iwwerdroe ginn.
- d'Pompjeesveräiner an deenen eenzelen Dierfer a Quartieren bestoe bleiwen, fir weiderhi méiglech vill Fräiwëlleger am Rettungsdéngscht ze hunn.
- dës lokal Kräfte Ënnerstëtzung kréien, fir Aktivitéiten an der Gemeng ze organiséieren.

Pompjees- a Rettungswiese si fir d'ADR e wichteg Bestanddeel vun der lokaler Sécherheet. Dofir sollen dës Kräfte an eisen Aen déi néideg Ënnerstëtzung kréien, fir sech beschtméiglech op lokalem Terrain organiséieren ze kënnen.



Dat lokaalt Pompjees- a Rettungswiesen ass wichteg fir d'Gemengesécherheet!



D’Gemengen an der Wuesstemsfal

Wat kloen eis Gemengepolitiker zu Péiteng an och an aner Uertschaften! A wat stëmmen aner Parteien an der Chamber äifreg fir eng Politik, déi de gréissten Deel vun deene Problemer ausléist!

Anescht wéi an anere Länner wíisst d’Wirtschaft zu Lëtzebuerg och a Krisenzäiten. Dat ass eent vun den Haaptziler vun der Lëtzebuerger Politik. En Zil, dat een awer méi genee misst ënnert d’Lupp huelen.

Esouguer a Krisejore ginn zu Lëtzebuerg nach eng 10.000 Aarbechtsplaze geschaf, a gudde Jore sinn et där gutt 15.000.

De Gros vun deene Aarbechtsplaze gëtt vu Grenzgänger besat, well hei am Land anscheinend déi néideg Qualifikatiounen feelen. 80 % vun de Grenzgänger komme mam Auto op hir Aarbecht, well den ëffentlechen Transport net déi néideg Kapazitéiten huet oder well si vun doheem net einfach a liicht un dës Linne kommen. Dat mécht am Schnëtt ronn 8.000 zousätzlech Autoe pro Joer aus. Een Auto bedeit sechs Meter am Stau. An anere Wierder gëtt eist Stroossennetz pro Joer mat 8.000 Autoen a mat bal 50 Kilometer Stau weider belaascht - iwwer den Dag verdeelt.

Wa mer eng Politik maachen vu weiderem stramme Wuesstem gëtt de Verkéierschaos vun Dag zu Dag méi grouss an déi eenzel Stiet an Uertschaften mat

Autoslawinen erstéckt.

Genausou verhält et sech mat der Wunnengsproblematik. Wa mir esou vill Aarbechtsplaze schafen an d’Leit all Dag am Stau stinn, ass et eng logesch Konsequenz, datt déi méi no bei hir Aarbecht wëlle wunne kommen. Duerfir gëtt den Drock op de Wunnengsmaat vu Joer zu Joer méi grouss, an d’Präisser, wéi an de leschte Joren, klamme praktesch ëm 5 % pro Joer.

Net nëmme ginn duerch Industriezonen d’Wissen zoubëtonnéiert, mee dës Politik dréit och nach zu engem zousätzlechen Verkéiersopkomme bäi. Mat dëser Politik wäert an den nächste Joren de Verkéierschaos virun allem op der Streck Bëff-Péiteng-Rodange vun Dag zu Dag méi grouss ginn.

Schäinhelleg ass et duerfir, wann d’Parteipolitiker aus der Gemeng versichen, sech de schéine Männchen bei hire Bierger ze maachen, a sech opreegen iwwer de Verkéierschaos, deen Dag fir Dag an dësen Uertschaften méi grouss gëtt.

Et sinn awer déi nämmlecht Politiker, déi op Gemengeplang matdecidéiert hunn, déi Industriezonen do ze implantéieren an op nationalem Plang als Deputéierten d’Politik vun engem maximale Wuesstem blannemännchen ënnerstëtzen.

Richtig wielen!

Dir wëllt der ADR bei dëse Gemengewalen esou gutt wéi méiglech hëllefen? Eise Walsystem erlaabt Iech dat op zwou Manéieren:

Am einfachsten a séchersten ass et, wann Dir de Krees iwwert der ADR-Lëscht schwaarz maacht. Esou stellt Dir net nëmme sécher, datt keng Stëmm fir d’ADR verluer geet, mee Dir ënnerstëtzt domat och all ADR-Kandidat gläicher Moossen.

Wann Dir awer ee vun de Kandidaten besser kennt oder ganz besonnesch gutt fannt an dësen dofir extra ënnerstëtze wëllt, da kënnt Dir Ärem Wonschkandidat och zwou Stëmmen ginn. Duerno fänkt dann allerdéngs d’Ziele un: An de Këschtchen hannert de Kandidaten kënnt Dir insgesamt **17 Kräizer** verdeelen, dann hutt Dir Äre Stëmmmaximum erreicht. De Krees iwwert der ADR-Lëscht dierft Dir dann awer NET méi markéieren.



A.D.R - Alternativ Demokratesch Reformpartei



Di Domenico Pipino		
Alves Oliveira Wildson		
Bouché André		
Di Domenico Linda		
Geschwind Metty		
Guarmouch Noredine		
Herin Marcel		
Junckel Steve		
Mollinger René		
Reiffer Maryse		
Sarbu Joseph		
Schaber Joël		
Schmidt Roland		
Schmitt Christian		
Steil Christian		
Welter Patrick		
Wolter André		



D’Alternativ  
fir  
Är Gemeng!



De Picky erënnert sech:  
D’Sozialisteschen Aarbechterpartei ass d’Partei vu gëschter. An et stëmmt: spéitstens iwwermuer gëtt d’LSAP net méi gebraucht.

**Lëscht 7**



**Di Domenico Pipino**  
57 Joer, Rodange  
Cafetier



**Alves Oliveira Wildson**  
38 Joer, Rodange  
Salarié



**Bouché André**  
51 Joer, Rodange  
Salarié



**Di Domenico Linda**  
22 Joer, Rodange  
Salariée



**Geschwind Metty**  
75 Joer, Péiteng  
Pensionéiert



**Guarmouch Noredine**  
38 Joer, Rodange  
Salarié



**Herin Marcel**  
56 Joer, Rodange  
Kabarettist



**Junckel Steve**  
43 Joer, Rodange  
Salarié



**Mollinger René**  
69 Joer, Rodange  
Pensionéiert



**Reiffer Maryse**  
52 Joer, Péiteng  
Wittfra, Hausfra



**Sarbu Joseph**  
64 Joer, Péiteng  
Geschäftsmann



**Schaber Joël**  
26 Joer, Rodange  
Salarié



**Schmidt Roland**  
50 Joer, Péiteng  
Pensionéiert



**Schmitt Christian**  
45 Joer, Rodange  
Pensionéiert



**Steil Christian**  
34 Joer, Lamadelaine  
Salarié



**Welter Patrick**  
48 Joer, Rodange  
Salarié



**Wolter André**  
22 Joer, Rodange  
Salarié